

## 5-§. Ўзбекистон Республикасидан ташқарида фаолият юритиш учун фойдаланиладиган активлар ва мажбуриятлар ҳисоби

26. Молиявий ҳисоботни тузиш учун, Ўзбекистон Республикасидан ташқарида фаолият юритиш учун фойдаланиладиган чет эл валютасидаги активлар ва мажбуриятлар қиймати сўмларда қайта ҳисобланиши лозим.

Чет эл валютасидаги активлар ва мажбуриятлар қийматини сўмларда қайта ҳисоблаш, ушбу чет эл валютасининг сўмга нисбатан Марказий банкнинг курси бўйича амалга оширилади.

27. Мазкур БҲМСнинг [15-бандида](#) келтирилган ва Ўзбекистон Республикасидан ташқарида фаолият юритиш учун фойдаланиладиган чет эл валютасида ифодаланган активлар ва мажбуриятларни сўмда қайта ҳисоблаш ҳисобот ойининг охирги санасидаги ва хўжалик операциялари содир бўлган санадаги Марказий банкнинг курси бўйича амалга оширилади.

28. Хўжалик юритувчи субъектнинг Ўзбекистон Республикасидан ташқарида фаолият юритиши учун фойдаланиладиган чет эл валютасида ифодаланган асосий воситалари, номоддий активлари, ўрнатиладиган асбоб-ускуналари, капитал қўйилмалари, товар-моддий захиралари қийматини сўмда қайта ҳисоблаш, ушбу активларни бухгалтерия ҳисобига қабул қилиш санасидаги Марказий банкнинг курси бўйича амалга оширилади.

Хўжалик юритувчи субъектнинг асосий воситалари, номоддий активлари, ўрнатиладиган

асбоб-ускуналари, капитал қўйилмалари, товар-моддий захиралари қийматини Ўзбекистон Республикасидан ташқарида фаолият юритиш жойи — хорижий давлатнинг қонун ҳужжатлари ёки қоидаларига мувофиқ қайта баҳоланган қийматини қайта ҳисоблаш, ушбу қайта баҳолаш ўтказилган санадаги Марказий банкнинг курси бўйича амалга оширилади.

29. Ўзбекистон Республикасидан ташқарида фаолият юритишнинг молиявий натижаларини шакллантирадиган, чет эл валютасида ифодаланган даромадлар ва харажатларни сўмда қайта ҳисоблаш, ҳисобот давридаги Марказий банкнинг курслари ва улар амал қилиш кунлари ҳосилалари суммасини ҳисобот давридаги кунлар миқдorigа бўлиш натижасида ҳисоблаб чиқилган курсларнинг ўртача миқдоридан фойдаланган ҳолда амалга оширилади.

30. Хўжалик юритувчи субъектнинг Ўзбекистон Республикасидан ташқарида фаолият юритиши учун фойдаланиладиган активлари ва мажбуриятларининг чет эл валютасида ифодаланган қийматини сўмларда қайта ҳисоблаш натижасида юзага келган курс фарқи бухгалтерия ҳисобида мазкур БҲМСнинг [17-бандида](#) кўрсатилган усуллардан бирини қўллаган ҳолда акс эттирилади.